


Minister Otmar Oduber a reconfirma

Pier y tereno na Savaneta ta keda pa e pueblo



ORANJESTAD (AAN): Recientemente pier di Savaneta a keda inaugura pa Minister Otmar Oduber, esaki despues cu pa añanan largo e habitantenan di e barío aki a keda sin nan lugar di recrea cu a worde usa pa varios generacion.

Den cuadro di renovacion di piernan, Minister Oduber a mira e necesidad di bin cu e pier aki pa Savaneta y despues di a finaliza fase 1 di e pier na Zeewijk/Cura Cabay y tambe e Centro di Pesca na Spaanslagoen, e pier di Savaneta a bin na beurt.

E mandatario a conta cu ta varios peticion verbal y por escrito el a haya pa bin cu e construccion di e pier aki cu a worde destroza pa horcan Ivan y cu nunca mas a worde drecha. Asina el a mira cu teniendo na cuenta e tradicion di e barío aki di haci uso di e pier aki y e peticionnan cu el a ricibi, cu el lo duna e prioridad necesario pa e habitantenan por recrea un biaha mas y piscador nan por mara nan boto eyman.

E dia di e inauguracion tabatin hopi habitante di Savaneta presente pa celebra e ocasion aki y dilanti nan tur Minister Oduber a anuncia cu e di dos fase di e proyecto aki lo ta e embeyecimento di e area banda di e pier caminda lo bin cu un area recreativo cu lo conta cu un gazebo y parkeerplaats entre otro.

Awe, Minister Otmar Oduber ta reconfirma e proyecto aki, el a lamenta cu oponentenan politico ta purba hunga un wega cu esaki bisando cu e proyecto aki no lo worde realiza mas y cu ta un cas lo worde construi eyman, ya cu e tereno a worde otorga na un famia caba.

Splicando riba esaki, manera el a bisa den pasado, e mandatario a duna di conoce cu en berdad tabatin un opcion riba e tereno aki, pero a papia cu e famia en cuestion y e siman aki ainda a sinta na mesa pa por haya un

otro opcion pa nan. El a bisa enfaticamente "Pier y tereno na Savaneta ta keda pa e pueblo!"

Minister Oduber ta un di e gobernantenan cu a demostra cu e ta traha y ta cumpli tambe y mester bisa cu tin mas na caminda pa e parti pariba di brug di nos isla. Mencionando e parti di piernan solamente, e mandatario a indica cu e renovacion di e pier na Rodgers Beach lo tuma lugar ainda, e di dos fase di e pier di Zeewijk/Cura Cabay lo worde realiza y tambe e di dos fase di e pier di Savaneta.

Asina Minister Otmar Oduber a sa di cumpli cu su proyectonan presenta y lo sigui traha na bienestar di comunidad di Aruba, independiente di cual barío cu ta, pasobra na final ta un solo Aruba nos ta!